

優等獎

臺北四事

林勇志

食

口腹京華盤上珍，銷金饌玉日橫陳；黃粱欲煮誰知夢，綠醕頻斟自醉春。
何處綺筵歡爨桂，幾家殘甑苦生塵；不均之患君須見，悵此無殊人食人。

衣

勸君休得與時違，俗好浮榮著錦歸；白袷冰清猶冷落，紫袍泥濁亦芳菲。
長裾善曳春風舞，短褐難登雲路飛；華服須當勤護惜，城中太半敬羅衣。

住

獨賃客窗秋不眠，遙看甲宅美輪焉；縱情珠閣人居易，寄傲書城我樂天。
菊枕未拋三徑夢，詩囊無愧一文錢；有朝唯願行仁政，能使黎民盡得塵。

行

大邑亨衢碧漢寬，所悲馳軌道紆盤；踟躕身事芳春夢，顛躓世情狂海瀾。
捷徑已迷心雜沓，窮途莫泣影孤寒；志存鴻鵠初衷在，踏破紅塵行路難。